

# Lelaki didakwa atas dua pertuduhan miliki dadah

**MIRI:** Seorang lelaki dihadapkan ke Mahkamah Majistret semalam atas dua pertuduhan memiliki dadah berbahaya.

Tertuduh, 41, dari Jalan Setia Raja di sini didakwa atas dua tuduhan di bawah Seksyen 12 (2) Akta Dadah Berbahaya (ADB) 1952 dan dihukum di bawah Seksyen 12 (3) akta yang sama.

Mengikut kesalahan ini, tertuduh boleh didenda sehingga RM100,000 atau penjara lima tahun atau kedua-duanya sekali, jika sabit kesalahan bagi setiap tuduhan dihadapi.

Berdasarkan pertuduhan kes, tertuduh bukan sebagai seorang yang diberi kuasa di bawah ADB 1952, didapati memiliki dadah berbahaya jenis Nimetazepam dan Keta-mine masing-masing seberat

5.5 gram dan 82.10 gram.

Kedua-dua kesalahan itu didakwa dilakukan tertuduh pada jam 11.10 malam, 16 November lalu di dalam bilik sebuah pusat hiburan di Pusat Bandar Commercial Centre, Fasa 2 Permyjaya di sini.

Timbalan Pendakwa Raya Mohamad Syafiq Samry memohon ditetapkan tarikh baru untuk sebutan lanjut sementara menunggu laporan kimia berhubung barang kes siap.

Majistret Ashok Linggam membenarkan permohonan itu dan menetapkan 27 Januari depan sebagai tarikh sebutan lanjut, sementara tertuduh yang tidak diwakili peguam bela diperintahkan dibebaskan dengan jaminan RM2,500 berserta seorang penjamin tempatan bagi setiap tuduhan.